



Hebreuse Wortels (Afr)

by **Eben Swart**
8 April 2013

'n Gebed van belydenis vir diegene wat betrokke was in die Hebreuse Wortels-beweging.

Gebed van belydenis tov die HWB en Torah-groepe (soos op die "Hebreuse Wortels"-DVD)

Vader, ek **verskyn** voor U in die **Naam van Yeshua ha Mashiach** om **belydenis** te doen van my **skuld** tov die **Hebreuse Wortels-beweging**. Op grond van 1 Joh. 1:9 vra ek dat U my sal **vergewe** vir my **oortredinge** en **sonde** in hierdie verband:

Die Stem van die Ruach:

Ek bely dat ek **nie weet** hoe die **Stem** van U **Gees**, die Ruach ha Kodesh, **klink** nie. Ek bely dat ek myself, by gebrek aan U rhema-stem, **slegs gewend het** tot U **geskrewe Woord** om U hoegenaamd te kon **hoor**. Ek bely dat ek gepoog het om Yeshua te leer ken slegs **buite-om sy rhema-stem**.

Ek bely dat ek my verdiep, verlustig en beroem het in die **Boom van Kennis**. Ek bely dat my verworwe kennis my **selftrots** en **eiewaarde opgeblaas** het, en dat dit vir my **aangenaam** en **aanvaarbaar** was.

Die Nuwe Verbond:

Ek bely dat ek myself **onderwerp** het aan **leringe** en **doktrines** wat ten doel het om U **Nuwe Verbond kragteloos** en **ignoreerbaar** te maak. Ek bely dat ek sodoende my **verbond met Yeshua verbreek** het, en **Hom as Saligmaker verwerp** het, terwyl ek die skyn bewaar het deur voort te gaan om die **verbondsmaal** te geniet. Ek bely dat dié doktrines waaraan ek myself onderwerp het, my **verblind** het vir die krag van U **Nuwe Verbond** sodat ek dit nie **kón begryp** nie.

Ek bely dat ek oor **geen ervaringskennis** beskik van die **verskil** tussen die **klip-Torah** en die **vlees-Torah** nie. Ek bely dat ek **geen idee** het wat die **Gees**, ipv die **letter**, van elke Torah-instruksie behels nie.

Ek bely dat ek vir **Jahwe**, wat **Gees** is, **gereduseer** het tot **letter** en **klip**.

Ek bely dat ek deur **doeie letter-onderhouding** gestreef het na toegang tot die **Lewe** wat net deur die **Gees** verkry word.

Die Okkult:

Ek bely dat ek myself onderwerp het aan **leringe** wat ten doel het om as **toegangspoort tot die okkult** te dien:

Piktogramme en hul **geassosieerde konsepte**,
gematria
en die **horoskopiese eienskappe** van **parshas**.

Ek bely dat ek die **okkultiese heksagram** of sg. “**Ster van Dawid**” as **banier oor my lewe** aanvaar het.

Lering:

Ek bely die bestudering van die **Talmoed**, die **Mishnah**, die **boeke** en **kommentare** van ongelowige, Judaïstiese **rabbi's**, asook ander **mistieke** en **simboliese leringe** van Westerse leraars op CD en DVD. Ook bely ek dat ek die talle **apokriewe stories** van HWB-leraars ongetoets aanvaar en nagepraat het, en sodoende **ander betrek** het by my eie misleiding. Ek bely dat hierdie studie en leringe onbybelse **verstandsvestings** in my verstaan van die Skrif veroorsaak het.

Ek bely dat ek die HWB-lering dat die **Torah** die “**Groot Oorspronklike**” en “**Bloudruk**” is, ongetoets aanvaar het. Ek bely dat hierdie lering veroorsaak het dat U **Raadsplan** in my verstaanswêreld **omgekeer** is, dat dit vir **Yeshua ondergeskik maak aan die Torah** en/of **Hom gelykstel aan die Torah**.

Ek bely dat **Yeshua**, saam met U, Vader, **Mede-outeur is van die Mosaïese Torah**, en **volle gesag** daaroor het.

Die Stem van die Ruach:

Daarmee saam bely ek ook dat U **Ruach ha Kodesh** oor volle **gesag** beskik om die **Torah** wat Yeshua op my innerlike vlees geskryf het - toe Hy my hart besny het tydens my gelowige doop - **na eie goeddunke te interpreteer** en na eie goeddunke deur sy Stem binne my aan my te **kommunikeer**.

Hiermee vra ek U dus om deur U Ruach se Stem **met my te praat**, en my te **leer** hoe sy **Stem klink**. Ek beloof om te **luister**.

Torah-Identiteit:

Ek bely dat ek my **identiteit** gebou het op die **Torah**, ipv op die **opgestane Yeshua**.

Ek bely dat ek toegelaat het dat my **identiteit** deur die klip-Torah **omvorm** is tot dié van ‘n **Ou Testamentiese Jood** wat **geen vryheid** in die opgestane Yeshua en sy Gees ken nie.

Ek bely dat ek gestreef het om te groei en **volwasse** te word in **klip-Torah onderhouding**, ipv om te **groei** en **volwasse** te word in **Yeshua**.

Ek bely dat my volharding in hierdie identiteit my **vervreem** het van my **broers en susters** in Yeshua wat wél hul identiteit op Hom gebou het.

Trots en hoogmoed:

Ek bely dat my **Torah-identiteit** die teelaarde was van **hoogmoed** en **trots** binne-in my. Ek bely dat ek myself as **suiwerder, meer gehoorsaam, beter toegerus** en van **hoër begrip** beskou het as ander Christene. Ek bely dat ek alle ander buite die HWB beskou het as **minderwaardig** en **misleid**, en as deelnemers aan die **Babiloniese sisteem**.

Ek bely dat ek myself beskou het as **medekurator** van **die enigste suiwer godsdiens** en **my sienings** op trotse en aanstootlike wyse op andere probeer **afdwing** het.

Godsdiens-gees:

Ek bely dat my **hoogmoed** en **trots** die teelaarde was waarop ‘n **godsdiens-gees** kon gedy en ‘n houvas op my kon kry. Ek bely dat hierdie godsdiens-gees my daartoe gedryf het om, ipv om nuwe siele vir Yeshua te wen, **ander Christene militant hul vryheid in Christus te probeer ontnem** en onder dieselfde **klip-Torah juk** as ekself in te dwing. Ek bely ek het in onderdanigheid aan hierdie gees dié wat die juk geweier het, **vervolg** en **beskinder**.

Hebreeus-afgod:

Ek bely dat ek die lering dat **Hebreeus** die **oorspronklike taal** op die aarde was, en dat dit 'n **heilige taal** is, ongetoets aanvaar en geglo het. Ek bely dat ek enersyds van Hebreeus '**n afgod in my hart** gemaak het, en andersyds die **Griekse taal** waardeur U gekies het om U Seun aan ons te openbaar, **verag** en **in U gesig teruggegooi** het.

Heilige, Hebreeuse Name:

Ek bely dat ek Yeshua se Grieks-afgeleide Naam - **Jesus** - **verag** en **belaster** het.

Ek bely dat ek **blatante leuens** oor die herkoms van hierdie Naam ongetoets **aanvaar**, **geglo**, en op my beurt **verder versprei** het.

Ek bely dat my **gebruik van Hebreeuse Name** tydens **gesamentlike byeenkomste hoogmoed** binne my aangevuur het, en dat ek dié wat in onbegrip daarvoor gefrons het, in my hart **verag** het.

Afwesigheid van Godsvrug:

Ek bely dat ek toegelaat het dat my Torah-identiteit en aanhang van die Joodse kultuur my **vasgevang** het in 'n **netwerk van aktiwiteite** wat my **fokus weggedraai** het van alles wat vir Yeshua belangrik is.

Ek bely dat ek my **aanbidding toegespits** het op die **skadubeeld**, ipv op die **realiteit van Yeshua**.

Ek bely dat ek die **geestelike gawes, vaardighede** en **salwing** wat Hy my gegee het vir diens in sy Koninkryk, **afgeskeep** en **verwaarloos** het in diens van 'n skadubeeld.

Ek bely dat ek die stem van **Moses** hoër geag het as die Stem van **Yeshua**. Ek bely dat ek bereid was om te **dien** en te **ly ter wille van Moses**, maar dat ek nie eens bereid was om te **luister** of ek U opdragte **via die Ruach** kan hoor nie. Ek bely dat ek **U rhema-stem geïgnoreer** het en **U logos-stem verhef** het asof dit **U enigste Stem** is.

Ek bely dat ek, deur **U rhema-stem** binne my te ignoreer, **U doel** met, en **droom** vir my, **gemis** het, en sodoende skuldig is aan **sonde**.

Paulus en andere:

Ek bely dat ek myself onderwerp het aan leringe wat **U gesalfdes** van die verlede **beswadder** en **bespot** het.

Ek bely dat ek ter wille van my eie geloofs-gemoedsrus **my hand** en **my mond gelig** het teen **U gesalfdes** en **gesagsdraers**.

Vader, ek bid dat U my vir al hierdie afskuwelike hartsgesindhede, dade en versuim sal **vergewe**.

Ek bid dat U my al die **leuens** van die HWB wat ek geglo het, sal **uitwys**, en my **U waarheid** sal leer.

Wil U my liggaam, verstand, hart en gees **suiwer** van alles wat nie vir U aanneemlik is nie.

Ek **meld** vandag opnuut **aan** vir diens in U Koninkryk. Wil U my **gebruik** tot U eer.

Amen.